

ouure les yeux, regarde le Ciel, ce pauvre aueugle obeyt fans replique, estant donc en la posture qu'on le demandoit, cette belle oculiste armée d'un morceau de canif ou de fer tout rouillé, luy racle les yeux, en forte qu'elle en fit tomber vne petite humeur, iamais ce pauvre Pere ne souffrit tant, la main de cette operatrice n'estoit pas si legere qu'une plume, & elle n'auoit non plus de dexterité que de science.

Enfin le malade estant defesperé de ces braues Medecins, qui auoient plus de bonne volonté que d'experience & que d'industrie; s'adresse à celui qui luy auoit donné les yeux, & le prie de les luy rendre vne autre fois si c'est pour sa gloire; il conuie les Sauuages de faire la mesme demande en cas que sa veuë leur pût estre profitable, ils s'affemblerent tous au lieu destiné pour faire leurs prieres, ils prennent la sainte Vierge pour leur Aduocate, le malade sçachant par cœur l'une des Messes qui se disent en son honneur, la commença, comme [61] s'il eust voulu dire vne Messe seiche, avec vne grande confiance que le Pere des lumieres luy donneroit quelque soulagement dans son mal. Or soit que le moment de sa guerison fust venu, ou que Dieu voulut exaucer les prieres des enfans en faueur de leur Pere par l'intercession de leur Mere, quoy que c'en soit, un rayon brillant deffilla tout à coup les yeux de ce pauvre aueugle, & luy rendit si parfaitement l'usage de la veuë au milieu de la Messe, qu'il n'a ressenty depuis ce temps-là ny douleur ny incommodité, ny des neiges ny de la fumée, & apres plusieurs mois de souffrances il est reuenu plain de santé en nostre maison, bien ioyeux d'auoir esté quelque temps Sauuage pour l'amour de IESVS-CHRIST.